

НА ЛИТИИ

Стихира новомучеником, глас 6.

Подобен: Отчаянная: Творение святителя Афанасия Ковровского:

Отчаянии есмы жития ради/ и не имамы нрава добродетельна,/ яко миро, приносим Ти, Господи,/ молитвы святых сродников наших./ Не отвержи Русь издревле Святую,/ ныне же грехов наших ради люте страждующую./ Не презри слезы верных сынов,/ колен своих пред Ваалом не преклонявших,/ и ихже не поразил еси, согрешающих.// Приими нас, кающихся, Боже, святых Твоих мольбами.

Слава, глас 8:

Приидите, мучениколюбцы,/ приидите, составим лик,/ торжествующе и Бога прославляюще/ в радостный праздник новомучеников и исповедников Российских,/ сии бо не уклонишася скорби,/ ни убояшася темницы,/ горькими работы, голодом и хладом изморени/ и многовидными муками умерщвляеми,/ яко агнцы незлобивии, смерть прияша./ И ныне в радости святых/ молят Троидинаго Бога о земном отечестве своем.

И ныне, глас тойже:

Владычице, приими молитвы раб Твоих// и избави нас от всякия нужды и печали.

НА СТИХОВНЕ

Стихира воскресна гласа.

Таже стихиры новомучеником, глас 2¹. Подобен: ДOME Евфрафов: Творение святителя Афанасия Ковровского:

¹ Существует практика петь стихиры «Земле Русская...», «Церковь Русская...», «Соборе святых русских...», «Новый доме Евфрафов...» как одну стихиру (поряд, без стихов) на «Славу»:

Земле Русская,/ граде святыи,/ украшай твой дом,/ в немже Божественный/ велии сонм святых прослави.

Стих: Господи, Господь наш,/ яко чудно Имя Твое по всей земли.
Церковь Русская,/ красуйся и ликуй,/ се бо чада твоя/ Престолу Владычню/ во славе предстоят, радуящися.

Стих: Святым, иже суть на земли Его,/ удиви Господь вся хотения Своя в них.

Соборе святых русских,/ полче Божественный,/ молитесь ко Господу/ о земном отечестве вашем/ и о почитающих вас любовью.

Слава, глас и подобен тойже:

Новый доме Евфрафов,/ уделе избранный,/ Русь Святая,/ храни веру Православную,/ в нейже тебе утверждение.

И ныне, Богородичен, глас 8. Подобен: «О, преславнаго чудесе»:

О, преславнаго чудесе!/ Небесе и земли Царица,/ от святых сродников наших умоляемая,/ до ныне землю Русскую покрывает/ и лика Своего изображении милостивно обогащает./ **О,** Владычице Державная!/ Не престани и на будущее время/ во утверждение на Руси Православия/ милости и чудеса изливати до века. Аминь.

На благословении хлебов Богородице Дево: дважды, и тропарь новомучеником, глас 4, единожды.

Тропарь новомучеником, глас 4:

Днесь радостно ликует Церковь Русская,/ прославляющи новомученики и исповедники своя:/ святители и иереи,/ царственные страстотерпцы,/ благоверныя князи и княгини,/ преподобныя мужи и жены/ и вся православныя христианы,/ во дни гонения безбожнаго/ жизнь свою за веру во Христа положившия/ и кровью Истину соблюдшия./ Тех предстательством, Долготерпеливе Господи,/ страну нашу в Православии сохрани// до скончания века.